

ORBEGOZO'TAR JOSE AGUSTIN AITA

Adiskide ta lankide

Gure artetik munduan ospetsu biurtzen diran gizonak urteten dabenean, ezin ukatu, gure barruan poztasun berezia zomatzen dogu. Gizabideko zomapena da!

Oraintsu, lankide ta adiskide dogun Orbegozo'tar Jose Agustin aita mundu guztiko Pasiotarren buru biurtu jaku. Zorionak!

Adiskide, bai, ainbat batzar eta ainbat egotaldi alkarregaz egiñak garalako eta lanerako jokabide bardiñak gure adiskidetasuna geroago ta geiago sakondu dabelako.

Eta lankide, batez be euskerearen bideak argitzeko Euskerazaintzaren inguruan egin doguzan lanetan eta ikastolen sortze-aroa izan zanean izan genduzan eztabaida ta gorabera bizietan.

Jose Agustin'ek maite dau Euskalerrria eta errazoi osoaz esan daike berak esana dan au: "Norberaren erria maite ez dauanak, ezin maitatu daikez beste erriak". Eta erri zapaldua askatzeko lana egin dauana ondo gertatuta dago beserri edo gizarte zapaldu batzui laguntzeko.

• Erki-buru eta nagusi orokor

Aurreko urteetan Euskalerrria kideko dauan Jesus'en Biotzaren Erkian buru izan ondoren, urrillean Erroma'n egindako Pasiotarren Batzar Nagusian Nagusi Orokor edo mundu guztiko Pasiotarren Buru izendatua izan da Jose Agustin, 69 autarkitatik 58 bere alde zirala.

Berau dogu mailla orretara eldu dan lenengo Euskalduna Pasiotarren artean. 52 laterritan banatuta bizi diran Kurutzeko Paulo'ren jarraitzaileak, zalantza barik, laguntza ona artuko dabe beragandik. Urrengo 6 urteetan, Jainkoa lagun, "Primus inter pares" beste sei eritxi-emoilleren artean dala bideratuko dauz mundu zabaleko arazoak.

Egunak eta urteak

Gipuzkoa'ko Goiaz'en, Bidania-ondoan jaioa dogu Nagusi Orokor barria, 1937'ko otsaillaren 1.^o egunean.



Jose Agustin Orbegozo bere lenen irakasle izan eban Kamilo aitaren ondoan.

Txikitatik, bere ikasketak asi eta lenengo urteetatik, beti izan dogu bertso-zalea eta plaza-gizona izan ez ba'da be, bertso idatziak ugari idatzi dauz.

Milla bederatzireun eta irurogeigarren urteko jorrallean egin zan abade eta gero bere ikasketak sakontzeko Erroma'ra joan zan an batez be Biblia-ikasketa sako-
nak egin eta arlo onetan baimendun biurtuta etorteko.

Gero toki batzutan teologia ta batez be Biblia irakatsi dau, euskeraz be bai, bere arlo berezia Pentateuko eta Bibliaren lenengo bost liburuak dirala.

Itxaropena

Gure erriak, erri guztietara zabaldu dan Eleizeak eta munduko erri guztiak laguntza ona izango dabe Jose Agustin'en lanetan eta bizitza luzea ta onuratsua opa dautsagu gure adiskide ta lankide oneri.

OLAZAR'TAR MARTIN'EK